

癆瘵門題辭

慎柔師所謂自下而上者勞症多係水枯火燥故特舉其大凡而內有命門真陽
衰者未嘗不仍用壯火之法惟真陽衰故虛火旺其源未嘗不合自在按脈識病
者臨時之善別而讀書明理者平日之善會耳至險怪之症于癆瘵通備既為一
門之顯牘不可不竟其詳雖世人不恒犯而適有犯者豈可無法以待之此先聖
賢已創于前而慎柔之婆心固不厭繁委次第以備全覽夫著書之難古今通患
千慮一失孰能無之在學者諒其創始之苦心而踵事增華自所望于高明君子
耳予與顧子持衡其舊聞稍加刪潤未敢以意為補竄也

慎柔五書卷之四

松江李林馥啟賢氏重校

石 震瑞章父訂正 顧元交勇尹父編次

瘦樵程永培校

癆瘵第四

脈法

癆瘵脈酉戌時洪盛寅卯時細弱者陽氣虛陷也忌服苦寒損其陽氣當以助陽之劑復其寅卯之位微加瀉陰火而已 若服寒涼證雖大減脈反加數者陽鬱也右脈大用保元湯左脈大用六味湯不減若燥者以瓜蒌生甘草散潤之

久病咳嗽氣喘若脈洪數不可即用補藥如服之虛火一退多令人痿倦不起須先用獨參湯以接其氣數日後數脈漸退方與調理為是

總論

夫癆者勞也非一端可盡或苦心竭其心脾之神志或酒色竭其肝腎之陰精或久痢久瘧傷寒傷暑諸症治之不當損其氣血傷其脾胃五臟乾枯而火起以致發熱則金受剋大腸先結燥而水之源先涸矣宜見脈見症用藥果當無不愈者若初熱未甚繼以治法之非久之即成蒸病蒸病者如醃之蒸熟之極也然使初病元氣尚強脈氣尚旺照古方用五蒸湯加減二十三蒸之法亦無不驗治蒸法服之病稍退又當察症清心參用癆病治方不可造次蒸病或十日半月熱極致骨

中血凝便化為蟲張仲景立祛血之法不使凝血化蟲麀蟲丸百勞丸是也倘治之不得其序不能祛血血化為蟲是時病人脈氣尚充精神尚旺猶可採也如聲啞喉痛寒熱大作脈細而數不思飲食精神視聽俱不能支皆屬不治又有火鬱痰凝氣滯咳嗽發熱氣喘葛先生保和湯保真湯次序用之火散痰開熱退總歸八珍湯調理又有吐紅咳嗽脈雖數有神不至於蒸極作蟲者脈洪脈數虛虛實實通變在乎心靈矣

骨蒸由氣虛不能化血血乾則火自沸騰肉如針刺骨熱煩疼或五心俱熱或兩肋如火或子午相應或晝微惡寒而夜反大熱雖腎經所主傳變不常蒸上則喘咳痰血舌黑耳鳴目眩等症蒸下則見夢遺淋濁泄瀉腰疼脚疼等症蒸中則見腹脹脇痛四肢倦怠等症

不問陰病陽病日久皆能傳變男子自腎傳心肺肝脾女子自心傳肺肝脾腎五藏復傳六府而死矣有始終只傳一經者有專著心腎而不傳者大要以脈為證驗凡氣血勞倦不運則凝滯疎漏邪氣得以相乘又飲食勞倦所傷則上焦不行下脘不通熱極蒸胸中而內熱生矣凡頸上有核腸中有塊或當臍冰冷或無力言動皆痰涎結聚氣血凝滯之所致故以開關啟胃為先蓋關脈閉則氣血乾竭胃氣弱則藥無由行但陽虛不可偏用辛香丁附之類陰虛不可用苦寒古方有開關

定胃散今亦難用竊其意推之

蟲為氣血凝滯瘀血化成但平補氣血為主加以烏梅青蒿硃砂之類而蟲自亡矣
紫河車丹紫河車丸青蒿膏蚘蛤散

選用惟度其虛實為主

凡體虛者宜先用補法扶其元氣然後用王道之藥佐之以殺蟲之劑如化蟲丸史
君子丸之類或追蟲後而繼以溫補亦可不然則蟲去而元氣亦散

傳屍之說不必深泥歷觀癆瘵皆因酒色之類損傷心血以致虛火妄動醫者不分
陰陽用藥病者不思疾由自取往往歸咎前因甚者疑及房室器皿墳墓及免業
飛尸遞相傳症古人云癆瘵三十六種惟陰德可以斷之不幸患此疾者或入山
林或居靜室清心戒慾專意保養庶乎病可除根不然即服藥不效

癆蟲須分五藏常居肺間正所謂膏之上育之下針之不得藥之不行只宜早灸膏
肓四花為佳若蝕肺系則咯血吐痰聲嘶思食無厭病患至此未易療治當參究
古法九蟲及一十八種蟲名之異并紫庭取蟲諸法

晝熱行陽二十五度大抵柴胡飲子夜熱行陰二十五度四順飲子平旦發熱熱在
行陽之分肺氣主之故用白虎湯以瀉氣中之火日晡潮熱熱在行陰之分腎氣
主之故用地骨皮散以瀉血中之火

肝症發熱肉下骨上寅卯尤甚瀉青丸人中白散心症發熱在血脈日中則甚單瀉

心湯導赤散硃砂安神丸脾症發熱在肌肉遇夜尤甚瀉黃散三白湯肺症發熱在皮毛日西則甚瀉白散甚者涼膈散腎症發熱在骨亥子尤甚兩手足心如火滋腎丸

尸注一症余嘗治之先癸亥夜二更六神皆聚之時灸腰眼穴七壯然後用藥倘不能待先用藥亦可注病亦似癆症但兩足無力行則痿疲是也其治法六脈洪數八物湯脾肺不足補中益氣湯睡不穩歸脾湯不思飲食六君子湯隨症推類但煎劑中須加忍冬葉三錢同煎本草以其葉能治尸注也

凡治勞症或男或婦若淫火不退者雖治不治

骨蒸勞

夫骨蒸勞者由於積熱附於骨而名也亦曰傳尸瘵殭復連無辜其名不一此病皆由脾胃虧損所致其形羸瘦泄痢肢體無力傳於腎則盜汗不止腰膝痛夢鬼交侵小便赤黃傳於心則心神怯悸喜怒不時頰唇赤色下熱下寒傳於肺則胸滿短氣咳嗽吐痰皮膚甲錯傳於肝則兩目昏暗脇下妨痛開戶忿怒五藏既病則難治療立齋云前症多因經行胎產或飲食七情而傷脾胃之所致又或病後失於調攝而成也

東垣云發熱之症肺熱者輕手乃得微按全無日西尤甚其症咳嗽寒熱輕者用瀉

白散重者涼膈散白虎湯地骨皮散心熱者微按之皮膚之下肌肉之上在血脈也日中大甚其症心煩心痛掌中熱而噦用黃連瀉心湯導赤散硃砂安神丸脾熱者輕手捫之不熱重手按至筋骨又不熱不輕不重在輕重之間在肌肉也遇夜尤甚其症怠惰嗜卧四肢不收無氣以動用瀉黃散肝熱者按之肌肉之下至骨之上寅卯時為甚其症四肢滿悶便難轉筋多愁多驚筋痿不能起於床用瀉青柴胡湯飲腎熱者按至骨分其熱蒸手其症骨酥如蟲蝕困熱不能起於床用滋陰丸此治實熱之法也

薛立齋云肺經虛熱者用人參補肺湯脾虛不能生肺者用六君子湯脾熱移於肺者用三黃丸心經虛熱者用補心湯命門火衰不能生土者用八味丸肝虛不能生心者用補肝散腎尅心者用附子理中湯脾經虛熱者用人參黃芪散土剋水者用承氣湯腎虛不能培肝者俱用六味丸

血風勞

血風勞症因氣血素虛或產後勞傷外邪所乘或內有宿冷以致腹中疼痛四肢酸倦發熱自汗及婦人月水不調面黃肌瘦當調肝脾氣血為主

東垣云喜怒不節起居不時有所勞傷皆損其氣氣衰則火旺火旺則乘其脾土脾主四肢故困熱懶言動作喘乏表熱自汗心煩不安當病之時宜安靜存養以甘

寒瀉其熱氣以酸味收其散氣以甘溫補其中氣經言勞者溫之損者溫之要畧云平人脈大為勞以黃芪建中湯治之

冷勞

冷勞者氣血不足藏府虛寒以致臍下冷痛手足時寒婦人月水失常飲食不消或時嘔吐惡寒發熱骨節酸疼肌膚羸瘦面色痿黃也

立齋曰前證有內外真寒有內外真熱亦有內真熱而外假寒有內真寒而外假熱若飲食難化大便不實腸鳴腰痛飲食畏寒手足逆冷面黃嘔吐惡見風寒此內外真寒之症也宜用附子理中湯以回陽八味地黃丸以壯火若飲食如常大便堅實胸腹痞脹飲食喜冷手足煩熱面赤嘔吐不畏風寒此內外真熱之症也宜用黃連解毒湯以滋陰六味丸以壯水若飲食如常大便堅實胸腹痞脹而飲食喜寒手足逆冷面黃嘔吐畏見風寒此內真熱而外假寒也亦用解毒湯六味丸而宜於熱服若飲食少思大便不實吞酸噯氣而手足煩熱面赤嘔吐不畏風寒此內真寒而外虛熱也亦用附子理中及八味丸而不妨溫飲經曰益火之源以消陰翳壯水之主以制陽光使不知真水火之不足泛以寒熱藥投之則舊病不去新病復生矣火之源者陽氣之根即心是也水之主者陰氣之根即腎是也非謂火為心原為肝水為腎主為肺也或者亦以命門為火原未為非是故用八味

丸以益命門耳

熱勞

熱勞由心肺壅熱傷於氣血以致心神煩躁煩赤頭疼眼澁唇乾口舌生瘡神思困倦四肢壯熱飲食無味肢體酸痛怔忡盜汗肌膚作疼或寒熱往來當審其所因調補氣血其症自減

立齋云前症乃壯火食氣煎熬真陰所致也王太僕云如大寒而甚熱之不熱是無火也當治其心大熱而甚寒之不寒是無水也當助其腎心盛則生熱腎盛則生寒然心虛則熱收於內腎虛則虛寒動於中竊謂前症若肝脾血虛四物參朮肝脾鬱熱小柴胡合四物脾胃氣虛補中益氣湯肝經血虛加味道遙散肝經風熱小柴胡湯心經血虛加味四物湯午前熱屬氣分清心蓮子飲午後熱屬血分四物參朮丹皮熱從左邊起肝火也實則四物龍胆山梔虛則四物參朮黃芪熱從臍下起陰火也四物參朮酒拌炒黑黃柏知母五味麥冬肉桂如不應急用加減八味丸不時面熱或無定處或從脚心起此無根虛火也用加減八味丸及十全大補加麥冬五味子主之已上多出自立齋婦人良方帙中但男女五藏相同間有少異其為勞則一也

癆瘵各症論

夫骨蒸殭喘半卧半起之謂復連內傳五藏之謂尸注勞注蟲注熱注冷注食注鬼注症者注也自上注下與前人相似故曰注其變有二十二種或三十六種或九十八種令人沉沉默默寒熱盜汗夢與鬼交遺泄白濁或腹中有塊或腦後兩邊有結核咳嗽膿血下痢羸瘦死而傳注甚至滅門更有飛尸遁尸寒尸喪尸尸症謂之五尸人為其症者不自知所苦雖有狸骨獺肝天靈蓋等方未嘗效也唯崔氏灸法早用有濟

若寒熱自汗面白目乾口苦神昏善恐不能獨卧傳在肝也若寒熱面黑鼻燥善忘大便秘瀉口舌生瘡傳在心也若寒熱面青唇黃舌本硬強言語不出飲食無味羸瘦吐涎傳在脾也若寒熱面赤鼻白乾燥毛折咯嗽喘急吐涎膿血傳在肺也若寒熱面黃耳焦脚脰酸痛小便白濁遺瀝腹痛傳在腎也已上陳臨川先生未
有治法

立齋云前症誠然有之故葛仙翁用獺肝一具陰乾杵末水下方寸匕日三服未愈再服宋宣和間一法師善考訊鬼怪時一婦以疾投狀既而如有鬼祟所附曰非我為患乃病人命自哀耳渠今已成蟲食肺故令吐血聲嘶又屢訊彼所畏何物云以獺爪為末酒服之則去矣患家如其言則愈獺爪即獺肝之類與元珠云蟲療多有互相傳染甚至絕戶此乃冤業相纏及風水所致雖有符文法水下蟲之

方蟲去而人亦亡但能平素保養或可希免救生微旨云益氣補肺益精補腎皆資其化源也蓋人之精血常不足加之數奪其精資化失常則胃氣不固精氣滑脫不能上接陽氣故頭重或氣弱食少元氣下陷脈微外散欲絕而虛洪或見損脈總屬元氣不足非有外感賊邪之證也

立齋嘗治一婦素勤苦因喪子肺病飲食少思脾病忽吐血甚多心病而自止此後每勞則吐數口瘵症已具形體甚倦午前以補中益氣湯滋其脾肺午後以歸脾湯養其心脾送地黃丸滋腎而愈

又一女子患前症反其唇視有白點此蟲蝕肺也余曰急尋獼肝治之不相信果略膿而歿後聞其兄弟三人皆夭於此症大凡久嗽當視其兩唇若上唇有點蟲蝕上部下唇有點蟲蝕下部

尸厥

夫飛尸者游走皮膚穿行藏府每發刺痛變作無常遁尸者附骨入肉攻通血脈見屍喪聞哀哭便發風尸者淫濯四肢痛而昏沉遇風雪便發沉尸者纏骨結藏內腫心脇發則絞痛遇寒冷便發注尸者舉身沉重精神錯雜時覺昏憤每至節氣便發已上並宜蘇合香丸治之

按丹溪云凡人手足逆冷膚粟頭面青黑精神恍惚或錯言妄語或牙關緊急或昏

寐倒仆弔死問喪入廟登墓多有此病先以蘇合香丸灌之次服調氣平胃散玉機微義云卒厥飛尸客忤鬼擊口噤用麻黃湯寒厥表熱裏寒則下利清穀食下則吐脈沉手足冷用四逆湯熱厥腹滿身重難轉面垢謔語遺溺手足冷自汗脈沉滑用白虎湯若人身忽然不動目閉口噤惡聞聲響眩冒頃時方寤此由出汗過多氣并於血陽獨上而不下氣壅塞而不行耳氣過血還陰陽復通移時方寤名曰鬱冒亦名血厥宜白薇湯倉公散

人病尸厥呼之不應者死脈當大反小者死

錦衣楊永興舉家避皆有僕沉醉失避者既而神思昏昧偏身青傷煎金銀藤湯灌之即愈

一婦人忽昏憤發謔語兩腳踝膝臂處皆青腫痛不可忍口稱苦楚次日方甦痛尚不止用金銀藤兩許水煎服愈

一婦人入古塚患前症以紫金錠灌之即愈

勞病主治湯方門

人參養榮湯 治男子血虛有汗潮熱 人參 白朮 茯苓 甘草 川歸

黃芪 肉桂 陳皮 遠志 熟地 五味子 薑水煎

補中益氣湯 治氣虛有汗潮熱 見虛損門

茯苓補心湯 治血虛無汗潮熱 人參 茯苓 陳皮 桔梗 枳殼 前胡

川芎 地黃 川歸 白芍 甘草 半夏 紫蘇 乾葛 薑棗水煎

人參清肌散 治氣虛無汗潮熱 人參 白朮 茯苓 赤芍 當歸 柴胡

葛根 甘草 半夏 薑棗水煎

八物湯 治女子血虛有汗潮熱 見虛損門

人參柴胡散 治氣虛無汗潮熱 白朮 葛根 半夏 柴胡 白茯苓 人參

赤芍 當歸 甘草 薑棗水煎

逍遙散 治氣血兩虛無汗潮熱 白朮 茯苓 甘草 白芍 歸身 柴胡

薑棗煎

人參五味子散 治咳嗽咯血 人參 五味子 桑白皮 白朮 黃芪 白茯

苓 地骨皮 熟地 柴胡 歸身 前胡 陳皮 甘草 枳殼 桔梗

渴加烏梅半個熟加青蒿知母

葛氏保和湯 治吐血後咳嗽 知母 貝母 天冬 麥冬 天冬花 天花粉

苡仁 杏仁 五味子 甘草 兜鈴 紫苑 百合 桔梗 阿膠 當歸

生地 紫蘇 薄荷 薑煎入飴糖一匙日三服 血盛加蒲黃茜根藕節大

薊小薊茅花 痰加南星半夏橘紅茯苓枳殼枳實瓜蒌仁 喘盛加桑白皮陳

皮大腹皮萊服子葶藶子蘇子 熟盛加山施黃連黃柏連翹 風盛加防風荆
芥穗金沸草甘菊細辛香附 寒盛加人參芍藥桂枝五味子白蠟

五蒸湯一治骨蒸 人參 黃苓 知母 地黃 葛根 煨石羔 粳米 麥冬

甘草 浮小麥一撮水煎

二十四種蒸病用藥法紀下方法俱從五
蒸湯見症加減

所謂勞蒸者毛折髮焦肌膚甲錯其蒸在皮又症舌白唾血加石膏桑白皮

外熱內寒身振肉瞤其蒸在肉又症食無味而嘔煩躁不安加芍藥

髮焦鼻衄或復尿血其蒸在血加生地當歸童子小便

身熱煩躁痛如針刺其蒸在脈又症唾白浪語脈絡亂緩急不調加生地當歸童便

爪甲焦枯眼黑脇痛其蒸在髓又症髓沸骨中熱加天門冬當歸生地

頭眩熱悶涎濁眵淚其蒸在腦加生地防風

男子失精女子白淫其蒸在玉房加知母黃柏當歸芍藥

乍寒乍熱中脘煩悶其蒸在三焦加竹葉石膏

小便赤黃凝濁如膠其蒸在膀胱又症右耳焦加澤瀉滑石

大便秘泄腹中雷鳴其蒸在小腸又症下唇焦加赤茯苓木通生地

大腹陰痛口舌乾疼其蒸在大腸又症右鼻孔乾痛加大黃芒硝

口鼻乾燥腹脹自汗睡卧不安其蒸在胃又症舌下痛加石膏粳米芒硝乾葛
口苦耳聾兩脇下痛其蒸在膽又症眼色白加柴胡瓜蒌

裏急後重肛門閉澁其蒸在廣腸加

缺

小腹疝痛筋脈縱緩陰器自強其蒸在宗筋加

缺

眩暈下淚躁怒不常其蒸在肝又症眼黑加川芎當歸前胡

舌黑氣短煩悶灑灑其蒸在心又症舌乾加黃連生地當歸

唇乾口瘡胸腹脹滿畏寒不食其蒸在脾加芍藥木瓜苦參

咳嗽喘滿咯痰吐血聲嘶音啞其蒸在肺又症鼻乾加天冬桔梗紫苑烏梅肉

耳輪焦枯脚氣酸痛其蒸在腎加生薑石膏知母寒水石藁本

情想不寧精物時下其蒸在右腎加

缺

心膈噎塞攻擊疼痛俛仰煩冤其蒸在膈加

缺

上氣喘促鼻乾身熱不安其蒸在氣加人參黃芩梔子

以上共二十三種加減條立齋先生引醫林集

胞蒸小便赤用澤瀉茯苓生地沉香滑石

膀胱蒸右耳焦用澤瀉滑石

骨蒸齒黑腹痛足脛瘦用鱉甲地骨皮丹皮當歸生地

臂蒸腿細肢腫腑臟俱熱用石膏滑石

膚蒸肌肉熱用牡丹皮 實熱加黃芩黃連黃柏大黃 虛熱加烏梅柴胡蛤蚧青

蒿蠶甲丹皮 以上出體仁彙編

薛立齋先生云凡此諸症虛勞熱病皆由食肉與油膩房勞飲酒而成者久蒸不除變為疳症即死亦有瘥久不愈以致咳嗽失治漸成骨蒸勞瘵當推標本而治之按立齋云蒸病二十四種止簡得二十三種體仁彙編言蒸病亦二十三種且蒸病各異各蒸下註或有或無可見病之險難人罕傳師所以闕漏無憑前後不一俟博觀者補之

海藏云以上諸蒸或藏病或府病或府藏俱病脈絡氣血交經相屬用藥皆當合而用之君臣佐使上下奇偶表裏虛實逆從通塞汗下補吐咸在其中凡蒸病不已骨節間陰有乾血用行血丸

大黃廔蟲丸 治一切勞傷內有乾血肌膚甲錯兩目黯黑緩中補虛 大黃十分

黃芩二兩 甘草三兩 桃仁升 杏仁升 芍藥兩 乾地黄兩 乾漆兩 廔蟲升

升 水蛭枚 蟻螬升 廔蟲升 煉蜜丸小豆大酒飲服五丸日三服

仲景百勞丸 治一切勞瘵積滯未經藥壞証者 當歸炒 乳香 沒藥錢一

人參 廔蟲十四個 水蛭十四個 炒 桃仁十四粒 去皮光 大黃錢四 蜜丸如桐子大